

De Zauberer vo OZ

nach L. Frank Baum
von Christoph Fellmann
UA: Dezember 2011

Personen

Dorothy
Der Zauberer von Oz

Löwe
Blechmann
Vogelscheuche

Hexe, *geistlos*
Hexe, *herzlos*
Hexe, *mutlos*

1

HEXE G
Und etz?

HEXE H
Das g'sähnd-mier de.

HEXE M
Wenn mier üs wieder g'sähnd.

HEXE G
Und wenn g'sähnd-mier üs wieder?

HEXE H
Wenn ächt.

HEXE M
Wenn's Wätter schlächt.

HEXE H
Meh als gruusig esch grad rächt.

ALLE HEXEN
Bi Donner, Blitz und Wirbelsturm.

HEXE M
Und wiit hinder allne Nächt.

HEXE H
Und wiit hinder allne Träum.

HEXE G
Ich gseh es Zimmer.

HEXE M
Ich gseh e Mönsch.

HEXE G
Ich gseh e Traum.

HEXE H
Ich gseh e Sturm.

Aufbruch.

ALLE HEXEN
Guet esch bös, und bös esch guet.

HEXE G
Rächt esch schlächt, und schlächt esch rächt.

HEXE M
Gschtört esch wie sich's ghört.

HEXE G
Ich gseh e Traum.

HEXE H
Ich gseh e Sturm.

HEXE G
Ich ghör es Gstürm.

ALLE HEXEN
Was für-n-e Melodie.

HEXE H
Ich gseh d Dorothy.

2

Dorothy in ihrem Zimmer.

DOROTHY
Sie sind wäg. Leu, do äne! *mit der Stimme des Löwen.*
Jawoll, Dorothy, Sir! *normal.* Leu, mier hend sturmfrei!
Löwe. Verstanden, Sir! Sturmfrei, Sir! *normal.* Leu, wie
luutet de Tagesbefähl! Löwe. Well, Sir, g'waltige Sturm
frei im Norde! Nei, Süde! Nei, esch doch gliich! De Fiind
stürmt mit allem wo-n-är hed, Sir! *Normal, während sie im
imaginären Schützengraben auf den imaginären Feind
schiessst.* Und, Underhund, was schlönd Sie vor?! Löwe.
Leu, Sir, ned Hund! *normal.* Was!? Ich g'höre nüt!! Löwe.
Sie sind e dumme Siech, Sir! *normal, hört auf zu
Schiessen.* Ha ha. Löwe. Leu-tnant, Sir. *normal.* Ou
chumm, hör doch uf, das esch längwiilig. *wirft den Löwen
weg.*

Sitzt da.

DOROTHY
Sett no rasch de Dragi aa-lüüte. – Nei, hör au uf, die esch
so piinlich in letschter Ziit.

Leichte Unschlüssigkeit. Macht die Musik an.

DOROTHY
S esch huere längwiilig.

Holt sich Büchsenravioli und beginnt zu essen.

DOROTHY
zu ihrem Handy. Chomm, lüüt ändlech aa, du Trööte, du
hesch gseid dass. *dreht die Musik lauter.* Und etz trousch
ned. *isst.* Memme. *zum Poster.* Legg-i-mi halt für dich
schön aa. *dreht die Musik lauter, zieht Kleider aus dem
Schränk.* So, so und so. *zum Poster.* Was meinsch? –
Hesch rächt. *zu den Kleidern.* Hender ghört? Är findt
euch au piinlich! Und weisch was, er hed rächt! Du
vertriibsch jede einigermasse cooli Typ. Nei, falsch. Du
vertriibsch sogar e blindi Chräie. *schmeisst die Kleider
weg.* Nei, stopp. *zieht dem Löwen das peinliche T-Shirt
über.* So, das passt. *lacht, dreht die Musik lauter.*

OZ
Come on baby, I'm not telling you no lie
Together tonight, we're gonna fly.

You're my starter, I'm your rocket to the moon
And I'm not bound to land too soon.
Don't be afraid, we're never gonna crash
But the air will be so hot
It may gonna burn some flesh.

Come on baby, let's never stop the ride
Together forever, let's stay side by side.
You're my sunshine, I'm your endless summer
Forget about the other bummers.
Everybody gets what every body deserves
And the air will be so hot
It may gonna burn some nerves.

Come on baby, I'm not telling you no lie
Together tonight, we're gonna fly.
You're my starter, I'm your rocket to the moon
And I'm not bound to land too soon.
Don't be afraid, we're never gonna crash
But the air will be so hot
It may gonna burn some flesh.

The air will be so hot
It may gonna burn some flesh.
It may gonna burn some flesh.

*Dorothy lacht, tanzt, singt mit. Oz steigt vom Plakat und
tanzt mit Dorothy. Dann zieht er sich wieder zurück, und
Dorothy tanzt allein, immer ausgelassener.*

*Auftritt der Hexen. Sie drehen die Musik lauter, wirbeln
Dorothy umher und bringen das Zimmer durcheinander.
Der Wirbelsturm wird lauter, heftiger.*

DOROTHY
Aaaaaaaah! Leu-tnant, do äne!

*Sie kann den Löwen gerade noch packen, dann wird sie
weggewirbelt.*

3

*Der Wirbelsturm legt sich. Die Hexen fangen Dorothy
sanft auf und legen sie auf den Bauch des nun lebendigen
Löwen, der immer noch das peinliche T-Shirt trägt.
Dorothy schläft. Dorothy erwacht.*

DOROTHY
Sind's scho dehei? hört. Hmm, alles still.

LÖWE
dreht sich im Schlaf.

DOROTHY
erschrickt.

LÖWE
erwacht.

DOROTHY
Du...

LÖWE
erschrickt.

DOROTHY
Du...

LÖWE
weicht zurück.

DOROTHY
Du... gang wäg!

LÖWE
brüllt.

DOROTHY
Du besch us Plüsch, du chasch ned...

LÖWE
Doro...

DOROTHY
Du chasch ned rede!

LÖWE
Doro...

DOROTHY
Gang wäg!

LÖWE
Doro.

DOROTHY
...

LÖWE
Bitte, ned so luut.

DOROTHY
Hä?

LÖWE
Du locksch d Häxe aa, und d Drache. Flügendi Affe,
Hammerchöpf, Kampfbäum, Monschterbienli,
Mönschegeier. Fleisch frässendi Salatchöpf. Schtei, wo
di lönd lo verschteinere, wenn sie aa-längsch. Gstrüpp,
wo di nie meh los lönd, wenn drii trampsch.

DOROTHY
Und Leue wo chönd rede.

LÖWE
Ned so luut.

DOROTHY
Und wo Schiss hend.

LÖWE
Jo.

Unschlüssigkeit.

DOROTHY
Und wie bisch du plötzlich...

LÖWE
Läbig? Im Land vo Oz bi-n-i das miner-läbdig gsi.

DOROTHY
Im Land vo Oz.

LÖWE
Genau. Oz.

DOROTHY
Oz.

LÖWE
Do chunnt normalerwiis niemer hii. S bruucht scho e
ziemlich starche Sturm. Du hesch mich mit-g'risse.

DOROTHY
Weiss-i nümm.

LÖWE
Debii ha-n-i nie meh z'rugg welle. S Läbe als Plüschtier
esch viel eifacher. Kä Häxe, kä Drache, kä Monschter,
höchstens mol es Chind. Und wenn-di das gliich mou
ume-rüehrt, passiert dir nüd, weil bisch jo us Plüsch.

DOROTHY
Du bisch ender de passivi Typ, he.

LÖWE
Und etz hock-i wieder do, dank dir. Danke. Vöumou.

DOROTHY
Esch ämu ned so schlimm do. Höchstens chli es Chaos.

LÖWE
Das gsehd nur so us. Eigentlich hed do alles sini genaui
Ornig. Nume, die Ornig könnt äbe nume de Oz.

DOROTHY
De Oz.

LÖWE
De Zauberer. De Zauberer vo Oz. Äbe de Oz.

DOROTHY
Wow.

LÖWE
Ned wow. Bis froh, wenn-d-ne nie könne lehrsch. Und är
dich ned. Aber wohrschijnlijk hed er di scho lang gseh.

DOROTHY
De cha-n-i jo grad zu-n-ihm go.

LÖWE
Spinnsch?

DOROTHY
Chonsch mit? *lacht.*

LÖWE
Bis still! Du chasch ned eifach zum Oz. Niemer cha zum
Oz. Niemer hed ihn je richtig gseh.

DOROTHY
Aber du weisch, dass-ne ged.

LÖWE
flüstert. Wenn doch sogar d Häxe uf ihn losid.

DOROTHY
Wenn im Land vo Oz d Häxe so mächtig sind, wie d Leue
muertig, de esch das au ned so erstuunlich.

LÖWE
traurig. ...

DOROTHY
Wotsch zrugg is Chinderzimmer?

LÖWE
nickt.

DOROTHY
Vielleicht chönnt-dir de Oz jo chli Muet äne zaubere.
lacht.

LÖWE
Mier? Im piinlichschte Leu uf de Wält.

DOROTHY
Ich goh etz.

LÖWE
Ich bliibe lieber do und bewege mich ned.

DOROTHY
schaut zu. Zittere esch im Fall au bewege.

LÖWE
Ha ha.

DOROTHY
Mach s guet, Leu-tnant. *lachend ab.*

LÖWE
zu sich. Dummi Nuss. Aber wart. *beginnt eine sehr scheue Boxeinheit.* Do, nimm, du Monschter. *Box.* Do, und do, du Salat Chopf. *Box.* Ich ha im Fall kä Angscht vor dir. *Box.*

Die mutlose Hexe wird hinter ihm auf die Bühne geschoben, unsichtbar für ihn.

HEXE M
Menschengeiergeräusch.

LÖWE
erschrickt. Mönschegeier! Ich versteck mi lieber. *ab.*

4

Andere Hexen dazu.

HEXE H
Ich gseh sie cho.

HEXE M
Menschengeiergeräusch.

HEXE G
Ich gseh es Härzli schloh.

ALLE HEXEN
Lachen.

HEXE M
Wo muess si hii?

HEXE G
Wo esch si gsii?

HEXE H
Wär esch si, und wo lauft sie drii?

In ihrem Lachen tritt Dorothy auf, unterwegs zu Oz.

DOROTHY
Wo...? – Hallo! –

Die Hexen, unsichtbar für sie, führen sie ständig in die Irre, in Sackgassen, im Kreis herum. Dann stellt sich Hexe h vor Dorothy.

DOROTHY
Ou, zum Glück trifft ich Sie. Chönnd Sie mier säge, wie-n-i zum Oz chume.

HEXE H
Sicher. Do, grad ufe.

DOROTHY
Was?

HEXE H
Nei, pardon. Muesch do graduus.

DOROTHY
Danke.

HEXE H
Bitte.

Dorothy weiter. Die anderen Hexen bauen vor ihr eine Mauer auf.

DOROTHY
dreht sich um zur Hexe. Aber...

Die Hexe ist verschwunden. Man hört unhörbares Gelächter.

DOROTHY
Danke vöumou. Sehr nätt.

Man hört einen Menschengeier. Dorothy erschrickt.

DOROTHY
Tami.

Man hört viele gefährliche Geräusche.

DOROTHY
Tamsiech. Ich chere-n-um.

Die Hexen lotsen sie zurück. Irgendwann nehmen sie das Versteck vor dem ängstlich verharrenden Löwen weg. Dorothy läuft rückwärts auf ihn zu und schliesslich in ihn hinein. Grosses Erschrecken.

Dorothy, LÖWE
Du. Nur du. *Panisches Lachen.*

DOROTHY
Wow.

LÖWE
Dass du wieder z'rugg trout hesch.

DOROTHY
S esch irgendwie huere kompliziert gsii.

LÖWE
Has jo g'seit.

Unschlüssigkeit.

LÖWE
Du, hesch das ernscht g'meint, wo-d vori g'seit hesch, de Oz chönnti mier chli Muet zaubere?

DOROTHY
Nei, worum?

LÖWE
Ich ha mier überleit: Vielleicht esch jo nume no nie öpper bim Oz gsi, weil no nie öpper trout hed hii z'goh.

Gelächter der Hexen. Menschengeierschrei. Löwe und Dorothy rücken zueinander.

DOROTHY
Ich hätt scho trout.

LÖWE
Jo, aber du könnst di do ned us.

DOROTHY
Stimmt.

LÖWE
Gömmmer?

DOROTHY
Kä Schiss meh?

LÖWE
Ich ha jo dich wo trout.

DOROTHY
Stimmt. Und wenn öppis passiert, ha-n-i dich.

LÖWE
Stimmt au.

DOROTHY
Du bisch immerhin e Leu. Esch ned nüt.

LÖWE
im Abgehen. Weisch, und wenn-i de Muet ha, de söllled die Hammerchöpf nume cho. De stohn-i vor sie häre, brülle, brülle no lüüter, und wenn sie de immer no ned ab-hauid, spring-i uf sie los, hau-ne mini Pranke i ihri Hammerchopfauge und brülle nomol. Oder nämmer aa, es fleischfrässende Salat Chopf hed dich gfange, de muesch nur rüefe...

DOROTHY
Jawoll, Leu-tnant, zu Befehl!

LÖWE
... und de chumm-i und brülle, brülle no lüüter, und wenn er di de immer no ned frei ged, spring-i uf dä Salat Chopf und riiss ne mit mine Chralle i tuusig Blättli, und vielleicht, wens muess sii, brüll-i de nomol. Oder e sone Mönschegeier, dä söll nur cho... usw. ab.

Auftritt Hexen.

HEXE G
Und etz?

HEXE H
Wer esch defür verantwortlich, dass sie dä Leu debii hed?

Hexe m und Hexe h blicken auf Hexe g.

HEXE G
Ich cha nüd defür, sie hed-ne im letschte Momänt no packt.

HEXE H
Und wer hed scho wieder d Uufgab gha, defür z'luege, dass sie im letschte Momänt nüt packt?

HEXE G
Jo. Sie esch eifach z'schnell gsi.

HEXE H
So. Schneller als e Häx im Wirbelsturm.

HEXE G
Jo, scho.

HEXE H
Du bäseblödi, gschlödergschiidi, warzeweichi Hutzelhäx!

HEXE G
...

HEXE M
Ned so tragisch. *tröstet sie.*

HEXE H
Schlimmer als tragisch!

HEXE M
hört auf.

HEXE H
S esch schlächt.

HEXE G
S tued mier leid.

HEXE H
Aber eigentli ganz rächt.

HEXE M
Päch esch Glück und Glück esch Päch.

HEXE H
Und Pächwurz esch käs Immertreu.

HEXE G
Und Leu esch Muus und Muus esch Leu.

Lachen.

HEXE H
Rächt so.

HEXE G
Sölid s cho.

HEXE M
Ich gseh sie scho.

Sie beginnen das Palasttor aufzubauen.

HEXE G
Ich gseh es Meitschi.

HEXE M
Ich gseh käs Ross.

HEXE G
Ich gseh e Leu.

HEXE M
De allerfeigschti.

HEXE H
Ich gseh es Schloss.

HEXE G
Sg'hört im Oz.

ALLE HEXEN
Und au chli öis.
Weil so-nes Schloss esch au nur Luft.
Weil au de Schlossherr fährt i d Gruft. *Lachen.*